

दिनांक 02.09.2024

समय: 18.45 बजे

## आकाशवाणी जयपुर—अजमेर प्रादेशिक समाचार

- मुख्यमंत्री भजन लाल शर्मा वरिष्ठ नागरिक तीर्थ यात्रा योजना रा तैत आज खास रेलगाड़ी ने जयपुर ऊं हरी झंडी बता र रवाना कीनी।
- पुलिस उपनिरीक्षक भर्ती परीक्षा पेपर लीक मामला मांय गिरफ्तार राजस्थान लोक सेवा आयोग रा पैली वाळा सदस्य रामूराम राईका ने थावर रा दिन ताँई एसओजी री रिमाण्ड माथे भेजी ज्यो।
- पेरिस पैरालंपिक मांय आज बेडमिंटन खिलाड़ी नितेश कुमार भारत ने सोना रो दूजो तमगो जितायो— भारत फिलहाल 22वीं ठौड़ माथे।
- प्रदेश मांय केर्ड ठोड़ां बिरखा रा समाचार—जयपुर रा केर्ड हलका मांय ज़ोरदार मेह बरस्यो।

000

मुख्यमंत्री भजन लाल शर्मा वरिष्ठ नागरिक तीर्थ यात्रा योजना रा तैत खास रेलगाड़ी ने आज जयपुर कने दुर्गापुरा रेलवे टेशन ऊं हरी झंडी बता र रवाना कीनी। रेल ने रवाना करण ऊं पैली राख्यी ज्या कार्यक्रम मांय वे कहयो के प्रदेश रा बुजुर्गा ने रेल ऊं सफर करावण सागे ई करीब 6 हज़ार बुजुर्गा ने हवाई जहाज रे जरिये ई तीर्थ यात्रा करायी जावेला। वे जातरूआं ऊं यात्रा रा अनुभव बतावण री अपील कीनी ताकि सफर रे दौरान रही कमियां आगी करी जा सके। वे कहयो के जिंदगी मांय तीर्था रो घणो महत्त्व है।

000

सड़क परिवहन अर राजमार्ग मंत्री नितिन गड़करी कहयो है के दुनिया री तीजी मोटी माली व्यवस्था बणबा सारू भारत ने आयात मांय कमी अर दिसावर मांय बिक्री मांय बधोतरी री ज़ुरूरत है। वे पेट्रोलियम अर

प्राकृतिक गैस मंत्री हरदीप सिंह पुरी सागे नई दिल्ली मांय भारत जैव ऊर्जा अर टैक एक्सपो 2024 अर अंतरराष्ट्रीय जैव ऊर्जा अर प्रौद्योगिकी सम्मेलन रा उद्घाटन रे मौके बोल रह्या हा। वे कह्यो के देश मांय जैव ईधन रा हलका मांय अपार संभावनावां है। ई मौके मंत्री पुरी कह्यो के सरकार एथेनॉल मिश्रित पेट्रोल, कम्प्रेस्ड बायो गैस, बायोमास अर कचरा ऊं ऊर्जा बणावण माथे खास ध्यान दे रही है। वे कह्यो के देश रो ऊर्जा कार्यक्रम काफी सफल रह्यो है। वे कह्यो के देश मांय पेट्रोल मांय एथेनॉल री मात्रा अक्टूबर 2025 तांई 20 फीसदी तांई पूग जावेला।

000

उपनिरीक्षक भर्ती परीक्षा रो पेपर लीक व्हेवण रा मामला मांय राजस्थान लोक सेवा आयोग रा गिरफ्तार करी ज्या पैली वाळा सदस्य रामूराम राईका ने अदालत शनिवार तांई एसओजी ने रिमांड माथे सूंप दीनो है। वां ने एसओजी री ओर ऊं आज करड़ी हिफाजत बीचे अदालत मांय पेश करी ज्यो। रामूराम राईका ने अदालत सामी पेश करण रे दौरान वकील हंगामो कीनो, जिण ने पुलिस रा अहलकार समझाइश कर र शांत करायो। ध्यानजोग है के आरपीएससी रा पैली वाळा सदस्य रामूराम राईका ने एसओजी काल पूछताछ सारू बुलायो हो, जिण ने मोड़ी रात गिरफ्तार कर लियो ज्यो।

इण ऊं पैली एसओजी थावर ने रामूराम राईका री बेटी शोभा राईका अर बेटा देवेश राईका समेत थानेदारी री सिखावण ले रह्या 5 जणां ने गिरफ्तार कीना हा।

000

जयपुर रा पुलिस मुख्यालय मांय आज सीआईडी अपराध शाखा रा 103 कर्मचारियां रो मान करीज्यो। अतिरिक्त पुलिस महानिदेशक दिनेश एम एन अर पुलिस महानिरीक्षक प्रफुल्ल कुमार महकमा मांय बेहतरीन सेवा देवण वाळा 33 अहलकारां अर कर्मचारियां ने डीजीपी डिस्क, 14 पुलिस वाळां ने अति उत्कृष्ट सेवा पदक, 20 पुलिस वाळां ने उत्कृष्ट सेवा पदक, 14 पुलिस वाळां ने सर्वोत्तम सेवा चिन्ह अर 22 पुलिस वाळां ने अति उत्तम सेवा चिह्न दे र नवाजा।

000

पेरिस मांय चाल रह्या पैरालंपिक खेलां मांय भारत रा नितेश कुमार पुरुषां री बेडमिंटन होड़ रा एकल मुकाबला मांय सोना रो तमगो जीत लीनो है। वे फाइनल मैच मांय ग्रेट ब्रिटेन रा डेनियल बेथेल ने 21–14, 18–21, 23–21 ऊं शिकस्त दीनी। पुरुषां री तस्तरी फैंक होड़ मांय भारत रा योगेश कथूनिया 42 दशमलव 22 मीटर दूर तस्तरी फैंक र चांदी रो तमगो जीत्यो। दूजी कानी कांसा रा तमगा सारु खेली ज्या बेडमिंटन रा मिक्स डबल्स मुकाबला मांय भारत री नित्या श्री सिवन अर शिवराजन सोलाईमलाई री जोड़ी ने इंडोनेशिया रे खिलाफ 21–17, 21–12 ऊं हार रो सामो करनो पड़्यो। भारत फिलहाल सोना रा दो, चांदी रा तीन अर कांसा रा चार तमगा जीत र 22वीं ठोड़ माथे है। महिलावां री एसयू–5 बैडमिंटन होड़ मांय भारत री तुलसिमति मुरुगेसन फाइनल मांय पूग ग्यी है। वा सेमीफाइनल मुकाबला मांय भारत री ही मनीषा रामदास ने हरायी। फाइनल मांय तुलसिमति रो मुकाबलो चीन री यांग खिउशिया सागे व्हेला, जदके मनीषा रामदास कांसा रा तमगा सारु डेनमार्क री कैथरिन रोसेनग्रेन रे खिलाफ खेलेला।

000.

पोषण महीना रे दौरान प्रदेश मांय न्यारा—न्यारा कार्यक्रम राख्या जा रह्या है। महिला अर बाल विकास विभाग री सचिव शुचि त्यागी अहलकारां ने छह भांत रा कामां माथे आधारित ई अभियान रा तैत शरीर मांय खून री कमी री जाँच करण सारु कह्यो। वे आंगनबाड़ी केन्द्रां मांय कर्या जावण वाढ़ा रोजीना रा कामकाज री जाणकारी जनआंदोलन डेशबोर्ड माथे अपलोड करण बाबत् ई कह्यो। आईसीडीएस रा निदेशक ओ पी बुनकर 7वां राष्ट्रीय पोषण माह री सरुआत रे मौके बाल विकास परियोजना रा तैत जयपुर रा मुरलीपुरा मांय आंगनबाड़ी केंद्र रो दौरो कीनो। वे “एक पेड़ मां के नाम” अभियान रा तैत पौधा रोप्या अर पोषण माह रैली ने हरी झंडी बता र रवाना कीनी। प्रदेश रा दूजा जिला ऊं ई पोषण जागरूकता कार्यक्रम राख्या जावण रा समाचार है। हनुमानगढ़ मांय जिला कलेक्टर कानाराम कलेक्ट्रेट परिसर ऊं पोषण जागरूकता रैली ने हरी

झण्डी बता र रवाना कीनी। ई मौके पोषण थीम माथे रंगोली ई बणायी ज्यी।

000

प्रदेश मांय आज ई केई ठोड़ा बिरखा छेवण रा समाचार है। जयपुर मांय दोपहर री बगत केई हलका मांय जोरदार मेह बरस्यो, जिण ऊं आवाण—जावण मांय परेशानी आयी। श्रीगंगानगर, सूरतगढ़, श्रीकरणपुर, अनूपगढ़ अर रायसिंह नगर हलकां मांय ई चोखा मेह रा समाचार है। बांसवाड़ा मांय ई दोपहरां री बगत तेज बरसात छ्ही। प्रदेश रा न्यारा—न्यारा बंधां मांय ई लगातार पाणी आ रहयो है। ढूंगरपुर जिला रा अमरपुरा बंधा माथे चादर चाल ग्यी है। मौसम विभाग ई सप्ताह चोखी बारिश रा आसार जताया है। महकमा रे मुजब कोटा अर उदयपुर संभाग मांय कठे—कठे भारी बारिश रा जदके जयपुर, जोधपुर अर अजमेर संभाग रा कुछ हलकां मांय मझला दर्जा री बिरखा री संभावना है। जोधपुर अर बीकानेर संभाग मांय कठे—कठे बिरखा छेवण रो अनुमान है। ई बीचे दक्षिण मध्य रेलवे रा विजयवाड़ा मण्डल मांय भारी बारिश ऊं रायनपाडु टेशन माथे पाणी भर जावण रे कारण रेलां री आवण—जावण माथे असर पड़यो है। उत्तर—पश्चिम रेलवे रा मुख्य जनसम्पर्क अधिकारी कैप्टन शशि किरण बतायो के ई कारण काल चेन्नई ऊं जयपुर सारू एक्सप्रेस रेलगाड़ी नी चालेला। ई सागे ई जयपुर ऊं काल जावण वाढ़ी कोयम्बटूर एक्सप्रेस ई रद्द कर दीरीजी है।

000

उदयपुर सिटी—आगरा कैट—उदयपुर सिटी त्रि—साप्ताहिक वन्दे भारत एक्सप्रेस आज सरू छ्ही। आ गाड़ी कोटा पूगण परां ऊर्जा मंत्री हीरालाल नागर लोको पायलट अर सहायक लोको पायलट रो माझा पहरा र स्वागत कीनो। वन्दे भारत एक्सप्रेस रे बूँदी, सवाईमाधोपुर, अर गंगापुरसिटी टेशनां माथे ई जनता रा नुमाइंदा गाड़ी चलावण वाढ़ा रो मान कीनो।

000

संसदीय कार्य अर विधि अर न्याय मंत्री जोगाराम पटेल आज जोधपुर मांय जनसुणवाई कीनी। वे संबंधित अहलकारां ने जनता री परेशानियां बेगी दूर करण रा हुकम दीना। जनसुनवाई मांय आया लोग शिक्षा, सङ्क, ईलाज, बिजली, पीवण रा पाणी अर पंचायतीराज समेत न्यारा—न्यारा महकमा ऊं जुड़ी शिकायतां मंत्री ने बतायी।

**000**

स्वच्छता पखवाड़ा रा तैत सवाईमाधोपुर रा पीएम श्री केंद्रीय विद्यालय मांय शिक्षक अर विद्यार्थी मिल र आज श्रमदान कीनो। वे स्कूल रा खास दर्जा रे आरे सारे री सफाई कीनी अर लोगां ऊं ई सफाई करण री अपील कीनी। स्वच्छता पखवाड़ा रा तैत 15 सितंबर ताई न्यारा—न्यारा कार्यक्रम राख्या जावेला।

**000**

डाक विभाग री ओर ऊं अजमेर मांय आवता साल जनवरी मांय डाक अदालत लगाई जावेला। ई अदालत मांय डाकघरां ऊं पेंशन लेवण वाळा पेंशनभोगियां री समस्यावां री सुणवाई कर र वां रो निपटरां कर्यो जावेला। ई हलका रा पेंशनर्स शिकायतां एक जनवरी 2025 ताई पोस्टमास्टर जनरल, राजस्थान दक्षिणी क्षेत्र, अजमेर रा दफ्तर मांय दे सके है।

**000**

सीमा सुरक्षा बल री 47 वीं इन्टर-फ्रंटियर फुटबॉल होड़ –2024 रो समापन जळसो खास पावणा मगन सिंह राजवी, प्रसिद्ध भारतीय फुटबॉल टीम रा पैली वाळा कप्तान, एम.एल.गर्ग, महानिरीक्षक, राजस्थान फ्रंटियर री मौजूदगी मांय जोधपुर मांय राख्यी ज्यो। 05 दिन री आ फुटबॉल होड़ 29 अगस्त ऊं सरु व्ही ही। होड़ मांय बीएसएफ रा 11 फ्रंटियरां री टीमां सिरकत कीनी। आ होड़ नॉक आउट अर लीग आधार ऊं खेली ज्यी जिण मांय कुल 18 मुकाबला व्हया।

**000**